

FONDACIJA
HASTOR

Newsletter
April, 2026.

20 generacija lidera: Rast i razvoj Fondacije Hastor

Fondacija Hastor već dvije decenije gradi temelje boljeg obrazovnog sistema u Bosni i Hercegovini, ulažući u mlade ljude koji su danas pokretači pozitivnih promjena u svojoj zajednici i šire. Ono što je počelo kao vizija jednog čovjeka, preraslo je u jednu od najznačajnijih filantropskih institucija u regiji- instituciju koja danas broji desetine hiljada dodijeljenih godišnjih stipendija i milione sati volontiranja.

Od samog osnivanja Fondacija Hastor njeguje uvjerenje da je obrazovanje najmoćniji alat za razvoj društva. Kroz godine ta vizija se pretvarala u konkretne živote - u djecu koja su dobila priliku, u studente koji su postali naučnici, poduzetnici, doktori, inženjeri, umjetnici, sportisti, profesori...

Putovanje kroz vrijeme...

Od svog osnivanja pa do danas, rast i razvoj Fondacije Hastor predstavlja dokaz da kontinuirana podrška obrazovanju iz temelja mijenja živote pojedinaca, ali isto tako ostavlja dugoročan trag na cijelo društvo. Od prvobitnih 304 dodijeljenih godišnjih stipendija u 20 godina rada došli smo do impresivne brojke od 28.000 dodijeljenih godišnjih stipendija, a sve ove godine aktivnog djelovanja iznjedrile su preko 2.300.000 volonterskih sati i nemjerljivog društvenog doprinosa. Svi naši stipendisti i alumnisti ujedinjeni su u istoj misiji filantropije i solidarnosti i upravo je to ono što nas izdvaja – ta sinergija stipendiranja i društvene odgovornosti kao srž postojanja Fondacije Hastor.

U toku našeg djelovanja veliki broj organizacija je prepoznao naš rad, a osim na državnom nivou gdje ističemo prestižnu nagradu za društveni utjecaj godine, naš rad i misija prepoznati su i na međunarodnom planu što je krunisano posebnim priznanjem za doprinos razvoju obrazovanja i mladih u BiH na Gala svečanosti Savjetodavnog vijeća za BiH u Washingtonu (ACBH).

Kao organizacija koja se veoma brzo iskazala kao svojevrsni inkubator perspektivnih mladih ljudi, možemo se pohvaliti svojim djelovanjem na području skoro cijele Bosne i Hercegovine. Pored velikog broja djece i mladih kojima smo kroz finansijsku podršku olakšali svakodnevni život pružajući im mogućnost da svoj fokus usmjere na školski i akademski uspjeh, kroz program volontiranja i mentorski program koji smo konstantno unapređivali omogućili smo im i da rade na svom ličnom i profesionalnom razvoju te razvijaju svoja znanja i vještine. Svoj doprinos razvoju mladih potvrdili smo i organizacijom programa obuke za mlade koje su ih dovele do prvih zaposlenja kao što su: Program razvoja pripravnika, TAKT akademija i mentorski program "Prvi korak u poslovni svijet". Na taj način smo nastavili graditi mostove između obrazovanja i tržišta rada pod budnim okom vrhunskih stručnjaka iz različitih oblasti koji su imali ulogu mentora polaznicima. Kroz seriju panel-diskusija namijenjenih svim studentima stipendistima stvorili smo neprocjenjivu mrežu znanja i poslovnih prilika s ciljem dodatnog osnaživanja i pripreme za tržište rada. Realiziran je inovativni poduhvat – projekt "Zajedno za znanje i obrazovanje", kojim Fondacija otvara svoja vrata i pruža podršku kroz besplatne instrukcije iz školskih predmeta i učenicima koji nisu njeni stipendisti.

Posebno smo ponosni na činjenicu da se porodica Fondacije Hastor proširila i u najtežim trenucima; pored redovnih stipendija, ruku podrške pružili smo učenicima i studentima s područja pogođenih poplavama, potvrđujući da niko u našoj zajednici ne ostaje sam, a kroz fond Srcem za BiH koji smo 2014. godine osnovali s ASA Prevent grupacijom, otišli smo korak dalje i postali aktivan učesnik u sistemskoj pomoći poplavama ugroženim područjima.

Duh zajedništva i solidarnosti živi i kroz rad Alumni kluba. Uz redovne susrete i digitalnu inovaciju u vidu nove Alumni aplikacije, naši bivši stipendisti pokazali su veliko srce organizacijom humanitarnih akcija podjele novogodišnjih paketića.

Kako bismo priče o uspjehu i ljubavi prema domovini podijelili sa svima, pokrenuli smo video-serijal "Ponosnim koracima kroz BiH". Kroz ovaj serijal obilazimo rodna mjesta naših uspješnih alumna, promoviramo ljepote Bosne i Hercegovine i otkrivamo priče koje su najbolji dokaz da mladi ljudi ovdje mogu graditi vrhunske karijere, ostati i ulagati u budućnost svoje domovine.

Ipak, iza svakog našeg projekta i volonterskog sata stoje inspirativne priče naših najboljih ambasadora – naših stipendista i alumna koji svojim ličnim uspjesima doprinose misiji Fondacije Hastor. Naš najvažniji rezultat povodom ovog velikog jubileja upravo su uspjesi koje su oni ostvarili. Riječ je o zlatnim matematičarima i fizičarima, svjetskim šampionima u sportskim disciplinama, mladim inovatorima, kreativnim umjetnicima, liderima koji iz dana u dan potvrđuju svoju izvrsnost, ali ono što je najvažnije je iznad svih titula i medalja: izrasli su u plemenite ljude i istinske filantropi, pokretače pozitivnih promjena koji osiguravaju da misija Fondacije Hastor zaživi u njihovim djelima.


Dvadeset generacija lidera Fondacije Hastor nije samo statistika - to su stvarni životi, stvarne priče i stvarne promjene. Svaki stipendista nosi u sebi dio te misije te nastoji graditi društvo i zajednicu njegujući pozitivne vrijednosti. Fondacija Hastor je kroz godine dokazala da filantropija nije samo davanje - ona je ulaganje u budućnost.



Fragmenti volonterskih priča

April, koji se širom svijeta prepoznaje kao mjesec humanosti, solidarnosti i međusobnog pomaganja, a koji je ujedno i mjesec osnivanja Fondacije Hastor, i ove godine obilježen je nizom inspirativnih volonterskih aktivnosti s ciljem poticanja mladih na aktivno djelovanje u svojim lokalnim zajednicama. Kroz veliki broj volonterskih sati, učenici i mentori su u različitim gradovima Bosne i Hercegovine pokazali da i male inicijative mogu imati snažan i dugotrajan utjecaj na društvo.

U Srebreniku, mentori su zajedno s učenicima kroz šetnju gradom aktivno posmatrali prolaznike i spontano pružali pomoć onima kojima je bila potrebna, bilo da se radilo o nošenju stvari ili sitnim gestama pažnje, čime su direktno primijenili naučene vrijednosti empatije. Aktivnosti su nastavljene u parku, gdje su učenici učestvovali u sadnji i zalijevanju cvijeća, čišćenju prostora, kao i brizi o životinjama kroz hranjenje i igru, razvijajući osjećaj odgovornosti prema prirodi i živim bićima. Poseban segment činile su radionice poput „Kutija problema i rješenja“ i „Empatija i pomoć drugima“, kroz koje su učenici otvoreno razgovarali o svakodnevnim izazovima i učili kako ih konstruktivno rješavati.



U Sarajevu su realizovane višestruke aktivnosti koje su obuhvatile humanitarni, edukativni i sportski aspekt volontiranja. Jedna grupa učenika je posjetila organizaciju Pomozi.ba, gdje su kroz proces sortiranja donacija učili o važnosti organizacije, odgovornosti i pažljivog pristupa radu, jer su morali procijeniti kvalitet doniranih stvari, pravilno ih razvrstati i pripremiti za dalju distribuciju onima kojima su najpotrebnije. Paralelno s tim, realizovane su aktivnosti pisanja pisama podrške djeci iz SOS sela, kao i priprema paketa sa slatkišima za djecu bez roditeljskog staranja, pri čemu su učenici pokazali visok nivo empatije i želje da obraduju druge. Također, jedna od aktivnosti bila je i ekološko-humanitarna akcija prikupljanja plastičnih boca i čepova, čijom reciklažom su prikupljena sredstva donirana u humanitarne svrhe, čime su učenici povezali brigu o okolišu sa brigom o ljudima. Poseban doprinos dala je i volonterka koja je kroz rad u sportskom kolektivu radila sa djevojčicama, organizujući treninge, pružajući im podršku u razvoju sportskih vještina, ali i jačanju samopouzdanja, discipline i timskog duha.



U Mostaru, aktivnosti su bile usmjerene na razvijanje ekološke svijesti i kreativnog izražavanja, gdje su učenici kroz radionice izrađivali igračke od recikliranih materijala, učeći o važnosti ponovne upotrebe i smanjenja otpada, dok su kroz crtanje i bojanje dodatno izražavali svoje stavove o zaštiti prirode. Posebno zanimljiva aktivnost bio je „Eko-mozaik“, gdje su učenici u grupama izrađivali dijelove zajedničke slike koristeći prikupljene materijale, simbolično prikazujući kako zajednički rad doprinosi većem cilju. Nakon toga, učenici su učestvovali u uređenju zelenih površina kroz sadnju cvijeća u lokalnom parku, gdje su kroz praktičan rad učili o važnosti očuvanja okoliša i zajedničkog djelovanja.



U Kalesiji, učenici su posjetili udruženje žena oboljelih od raka dojke, gdje su kroz zajednički rad i druženje pružili podršku članicama udruženja, učestvujući u izradi cekera i drugih rukotvorina koje se koriste u humanitarne svrhe. Tokom ove aktivnosti učenici su imali priliku čuti inspirativne priče žena koje su prošle kroz teške životne izazove, što je dodatno uticalo na razvoj njihove empatije i svijesti o važnosti zdravlja i međusobne podrške, dok su svojim angažmanom doprinijeli radu udruženja i njegovim humanitarnim ciljevima.



Volonterske aktivnosti u Derventi realizovane u Centru za djecu i omladinu sa smetnjama u razvoju, gdje su učenici kroz igru, crtanje, slaganje puzzli i druge kreativne aktivnosti provodili vrijeme sa korisnicima centra, stvarajući sigurno i podržavajuće okruženje. Posebno značajna bila je aktivnost izrade zajedničke slike od puzzli, koja je simbolizirala jedinstvo u različitosti, dok su učenici kroz individualni pristup svakom djetetu razvijali strpljenje, razumijevanje i socijalne vještine.



U Zvorniku su aktivnosti bile usmjerene na upoznavanje i očuvanje kulturno-historijskog naslijeđa kroz posjetu Kula gradu, gdje su učenici kroz edukativni i terenski rad učili o značaju spomenika i njihovoj ulozi u identitetu zajednice. Kroz čišćenje lokaliteta, fotografisanje i izradu kreativnih poruka o očuvanju baštine, učenici su razvijali osjećaj odgovornosti prema kulturnom naslijeđu i aktivno učestvovali u njegovoj promociji.



U Prnjavoru su učenici realizovali akciju „Kutija dobrote“, kroz koju su građani imali priliku donirati ili uzeti potrebne stvari, čime se poticala kultura dijeljenja i međusobne podrške, dok su dodatno kroz izradu motivacionih poruka širili pozitivnu energiju u javnom prostoru, ostavljajući snažan utisak na zajednicu.

k

Ovo su samo neke od mnogobrojnih realizovanih aktivnosti u mjesecu aprilu koje jasno pokazuju da volontiranje predstavlja snažan alat za izgradnju humanijeg društva, te da mladi kroz konkretne akcije mogu razviti vrijednosti koje će ih pratiti kroz cijeli život. Kroz različite oblike pomoći, edukacije i zajedničkog rada, učenici su pokazali da činjenje dobrih djela nije samo povremena aktivnost, već način života koji doprinosi izgradnji bolje i solidarnije zajednice.

Poruke zahvalnosti

Naš veliki jubilej donio nam je pregršt toplih poruka od naših stipendista i alumnista. Kroz uspomene i riječi zahvalnosti koje su podijelili s nama, još jednom su potvrdili neprocjenjiv značaj koji Fondacija Hastor ima u njihovim životima. Upravo njihove priče daju smisao svakom našem zajedničkom koraku u protekle dvije decenije, a u nastavku izdvajamo samo mali dio tih inspirativnih svjedočanstava.

Kroz brojna druženja i aktivnosti Fondacija mi nije pružila samo finansijsku podršku, nego i osjećaj sigurnosti i motivacije da budem bolja verzija sebe. Uvijek su bili uz nas kao podrška i oslonac u svakom koraku našeg razvoja. Fondacija Hastor je za mene mnogo više od stipendije, ona je naš vjetar u leđa koja nam daje priliku da rastemo i ostavarimo svoje ciljeve.

Melika Ibrišimović

Već 13 godina sam dio Fondacije Hastor, koja mi je kroz sve ove godine pružila izuzetno veliku podršku u mom školovanju, ali i mnogo više od toga. Biti dio Fondacije za mene nikada nije značilo samo stipendiju – to je bila prilika za lični rast, razvoj i izgradnju vrijednosti koje danas nosim sa sobom. Kroz podršku koju sam dobijala, naučila sam koliko je važno vjerovati u sebe, ostati dosljedan svojim ciljevima i ne odustajati čak ni onda kada se čini teško. Fondacija me ohrabrila da prepoznam vlastiti potencijal i dala mi snagu da idem naprijed sa više samopouzdanja. Također, kroz Fondaciju sam konstantno upoznavala nove ljude iz različitih sredina, sa kojima sam izgradila iskrena i posebna prijateljstva. Ta poznanstva su obogatila moj život i pružila mi osjećaj pripadnosti jednoj velikoj i podržavajućoj zajednici. Danas mogu reći da me Fondacija Hastor oblikovala kao osobu – naučila me odgovornosti, upornosti i važnosti međusobne podrške.

Erna Bećirspahić

Sjećam se dana kada sam prvi put osjetila šta zapravo znači biti dio nečega većeg. Nije to bio samo još jedan sastanak ili okupljanje – bio je to trenutak kada sam shvatila da nisam sama, shvatila da postoje ljudi koji vjeruju u mene čak i kad ja sama sumnjam. Osmijesi, podrška, male riječi ohrabrenja i osjećaj pripadnosti ostali su mi urezani dublje nego bilo šta drugo. Ta uspomena me uvijek podsjeti koliko je važno imati nekoga ko te gura naprijed i vjeruje u tvoje snove – i koliko takva podrška može promijeniti cijeli tok nečijeg života.

Aida Hajdarević

Kada sam prvi put zakoračila u svijet volontiranja, vodila me je jednostavna želja da budem korisna društvu. Međutim, nisam ni slutila da će me taj put odvesti do onoga što danas smatram svojom najvrednijom životnom školom, mentorstva mladim ljudima. Ako bih morala sažeti svoje iskustvo na jednu stranicu, ona ne bi bila ispisana samo mojim riječima, već energijom, idejama i uspjesima onih kojima sam imala čast biti podrška. Sjećam se radionica na kojima smo zajedno rješavali izazove. Gledati kako neko pod tvojim usmjeravanjem prvi put artikuliše svoju viziju, kako se oslobađa straha od neuspjeha i počinje vjerovati u svoje sposobnosti, osjećaj je koji se ne može mjeriti ni sa jednim poslovnim uspjehom.. Najveća nagrada mi je kada danas vidim te mlade ljude kako sami postaju mentori drugima, šireći taj krug podrške dalje. To je dokaz da mentorstvo nije samo prenošenje vještina, već prenošenje vrijednosti.

Sumeja Subašić

Fondacija je jedna od mojih najdražih uspomena sa studiranja: ljudi koje sam upoznala, iskustva i vještine koje sam stekla radeći u administraciji, popodneva i jutro koja sam tu provela. Biti dio ove velike i humane priče imena Fondacija Hastor stvarno je privilegija. Kada se sjetim ovog perioda, najdraže sjećanje mi je na sami prvi dolazak u kancelariju FH kada sam postala dio administracijskog tima: sjećam se da sam bila zabrinuta razmišljajući o svemu što me čeka i hoću li biti opravdati povjerenje, ali jedino na šta sam naišla su nasmijana lica uposlenika, savjeti i razgovori sa tada tu prisutnim stipendistima, a sve ostalo je historija.

Ilhana Tinjak

Imati uz sebe jednu tako veliku i posvećenu Fondaciju od izuzetnog je značaja, jer nas od samog početka usmjerava ka pravim vrijednostima, obrazovanju, radu na sebi i doprinosu zajednici. Zahvaljujući tom iskustvu, naučila sam da će na tom putu uvijek postojati ljudi spremni da nas podrže. Osim predivnih uspomena na volontiranje i prve mentorske dane, važno je istaći koliko toga zapravo naučimo kroz Fondaciju, često i nesvjesno. Ono što posebno izdvajam jeste osjećaj odgovornosti prema obavezama, a to mi danas pomaže u svim segmentima života.

Kažu da se uz jednu olovku i jedan papir može promijeniti svijet. Ja bih dodala i uz jednu fondaciju.

Amina Bahtanović

Kroz volontiranje u Fondaciji Hastor sam se oslobodila i izgradila komunikacijske vještine, jer su uvijek svi uposlenici bili razumljivi i izlazili u susret. Nikada se nisam osjećala osuđivano, te sam se uvijek osjećala kao dio zajednice, što se trudim prenijeti i ponoviti kod novih volontera u kancelariji. Taj osjećaj zajedništva, prihvatanja i samim tim osjećaj kao da uvijek imam nekoga na koga se mogu oslonuti je neprocjenjiv. Uvijek ću biti zahvalna Fondaciji, jer me je podigla, bila uz mene u najtežim trenucima i pomagala mi tokom čitavog visokoškolskog obrazovanja.

Enisa Šeho

Fondacija Hastor za mene nikada nije bila samo finansijska podrška, nego mnogo više od toga – put mog ličnog razvoja i osnaživanja. Još kao učenica, kroz radionice, druženja i volontiranja, imala sam priliku da učim, razvijam se i upoznajem ljude koji su me motivisali da budem bolja verzija sebe, ali najviše sam shvatila koliko to sve znači kada sam i sama postala mentor i primjer mlađima od sebe. Posebno mi znači kada učenicima približim neku temu, dam im nove vidike i strategije koje mogu koristiti u životu, ali i kada mi se jave s povratnom informacijom da su im te strategije stvarno pomogle ili da su, zahvaljujući mojim pojašnjenjima, zavojljeni neki predmet i popravili ocjene. Fondacija Hastor je za mene postala druga porodica – puna podrške, znanja i ljudi koji iskreno žele pomoći i podijeliti dobro dalje. Neizmjereno sam zahvalna što sam, već dugih 15 godina, imala priliku biti dio priče Fondacije Hastor, koja je postala jedan od najvažnijih dijelova mog života i koja je svojim ljudima, iskustvima i podrškom obilježila moj put i ostavila neizbrisiv trag u onome što danas jesam.

Vildana Halilić

Najljepše uspomene koje me vežu za Fondaciju Hastor su opuštena atmosfera i ljudi koji je čine posebnim mjestom. U kancelariji uvijek vlada dobra energija. Svi su spremni pomoći, ali se isto tako znamo opustiti i nasmijati zajedno što baš volim. Upravo ti trenuci smijeha i zajedništva su ono što ću najviše pamtit. Posebno mi je drago što se i u ozbiljnim trenucima uvijek pronađe razlog za osmijeh i zahvalna sam na tome. Ta kombinacija rada, podrške i iskrene radosti čini da svaki dolazak u kancelariju bude lijepo iskustvo koje lijepo pamtim. Uz sve to, osjećaj pripadnosti i međusobnog poštovanja dodatno uljepšava svaku uspomenu. Lijepo je znati da postoji mjesto gdje se ljudi razumiju, podržavaju i zajedno stvaraju lijepe trenutke. Uvijek sam sretna doći ili spomenuti, moju Fondaciju Hastor. Hvala Vam.

Ada Avdagić

Pozivamo Vas da se pridružite našoj misiji i doprinesete ispunjenju snova perspektivnih učenika i mladih ljudi koji trebaju našu pomoć!

Podržite nas.

Ukoliko želite podržati rad Fondacije Hastor, uplatu donacije možete izvršiti na jedan od transakcijskih računa.

ASA Banka dd Sarajevo

1346101000825159

Raiffeisen Bank BH dd Sarajevo

1610000055230065

Unicredit Bank dd Sarajevo

3389002201775656



FONDACIJA

HASTOR



Kontaktirajte nas!

Bulevar Meše Selimovića
16, Sarajevo
033 774 789
033 774 823
fondacija@hastor.ba



Redakcija

Lamija Karađuz
Lamija Sejdić
Aida Suljić
Adina Jusufspahić
Ajna Šido
Amina Bašić
Emra Kulo Begić



Grafički dizajn

Salko Hamzić